

ꦑꦶꦁꦠꦸꦁꦠꦸꦁꦠꦸꦁꦠꦸꦁ
AWIG-AWIG

ꦒꦸꦱꦏꦸꦭꦠꦤ꧀ꦠꦁ
DESA ADAT BATULANTANG



ꦒꦸꦱꦏꦸꦭꦠꦤ꧀ꦠꦁ
DESA SULANGAI
ꦏꦺꦴꦩꦠꦤ꧀ꦥꦺꦠꦁꦏꦧꦸꦥꦠꦺꦤ꧀ꦧꦢꦸꦁ
KECAMATAN PETANG, KABUPATEN BADUNG

ꦮꦫꦱꦱ
WARSA 2010

DAGING AWIG-AWIG

<i>Murdha citta</i>	0
SARGA I ARAN LAN WEWIDANGAN SUBAK ABLAN.....	1
SARGA II PAMIKUKUH, PATITIS LAN UTSAHA.....	2
SARGA III SUKERTA TATA PAKRAMAN.....	3
<i>Palet 1 Sang Jumenek ring Batulantang</i>	4
<i>Palet 2 Indik Prajurit Desa.t</i>	8
<i>Palet 3 Indik Kukul</i>	11
<i>Palet 4 Indik Paruman</i>	14
<i>Palet 5 Indik Druen Desa</i>	16
SARGA IV: SUKERTA TATA AGAMA.....	19
<i>Palet 1 Indik Dewa Yasnya</i>	19
<i>Palet 2 Indik Resi Yadnya</i>	25
<i>Palet 3 Indik Pitra yadnya</i>	26
<i>Palet 4 Indik Manusa Yadnya</i>	32
<i>palet 5 Indik Bhuta Yadnya</i>	34
SARGA V : SUKERTA TATA PAWONGAN.....	36
<i>Palet 1 Indik Pawiwahan</i>	36
<i>Palet 2 Indik Nyapihan</i>	40
<i>Palet 3 Indik Sentana</i>	42
<i>Palet 4 Indik Warisan</i>	44
SARGA VI: SUKERTA TATA PALEMAHAN.....	47
<i>Palet 1 Bhaya</i>	47
<i>Palet 2 Karang Tegal/Carik</i>	49
<i>Palet 3 Pepayonan</i>	51
<i>Palet 4 Wewangunan</i>	52

<i>Plet 5 Wewalungan</i>	53
SARGA VII : WICARA LAN PAMIDANDA	54
<i>Palet 1 Indik Wicara</i>	54
<i>Palet 2 Indik Pamidanda</i>	55
SARGA VIII: NGUWAH-NGUWUHIN AWIG-AWIG	57
SARGA IX PAMUPUT	57

MURDHA CITTA

Om Swastyastu Nano Siwaya

Kawit saking panghyaning kalih saking asung kerta wara nugraha yang Widhi Wasa, saha malarapan antuk sagilik saguluk, muah cita nirmala, pamuput sida kasurat awig-awig puniki, pinaka bungkah Desa Adat sajeroning midabdabin kasukertan Krama Desa Adat malarapan antuk sahanan Dharma prawertinya ngerajegang Sang Hyang Aji Agama, manut Sang Hyang Catur Dresta.

Munguwing Desa Adat puniki wantah pawakan pasubayan I Krama Desa manut sastra dresta. Desa Adat puniki kawentenan ipun satmaka buana agung. Genah pawongan neri-neri/paumahan, sinanggeh buana alit. Buana agung lan buana alit puniki yan sampun patemonnya adung lan manut, mawinan sida metu santa jagathita, kauripin sukerta sekala lan niskala, pinaka sinanggeh prayojanan, pangriptaning awig-awig.

Desa Adat kalih uger-uger pepelihan ipun manut pisan ring katatvwaning Tri Hita Karana sane kamanggehang, kapawos kadi inucap :

1. Parhyangan, maka jiwatmaning muah murdaning DEsa Adat.
2. Palemahan, kakuwub pawidangan Desa Adat, manut ring kawentenan kalih kemanggehang wates-watesnyane sane nyatur Desa.
3. Pawongan, boya sewoa wantah ida dane krama Desa Adat sami sane jumenek ring palemahan Desa Adat inucap.

Tri Hita Karana miwah Sanghhang Catur Dresta puniki, pinaka wit uger-uger keanggen awig-awig, kadadosang sad Sarga, saha pawos- pawosnyane, sami ,mapetitis sidaning don, ngardinin kasukertan ring Desa pakraman. Mogi-mogi sida kapanguh Moksartam Jagathita.

“Om Santi Santi Santi Om”

SARGA I

ARAN LAN WEWIDANGAN DESA

Pawos 1

Wewidangan desa Batulantang

1. Desa Adat puniki mawasta Desa Adat Batulantang.

2. Jimbar wewidangan nyatur lwire :

ha. Sisi Wetan Tukad yeh Kilap

na. Sisi Kidul desa Adat Angantiga.

ca. Sisi Kulon Desa Adat Sulangai.

ra. Sisi Lor Desa Adat Tohjiwa.

3. Kakuwuban Palak Desane kadi ring sor :

ha. Papupulan karang paumahan, sinanggeh palemahan Desa pakraman.

na. Setra, sawah miwah tegal ring kakuwuban palak Desane sajabaning palemahan Desa pakraman, sinanggeh Telajakan Desa.

4. Desa Adat puniki kaepah dados asiki banjar Adat inggih punika :

Banjar Adat Batulantang

5. Wewidangan palemahan banjare kamanggehang olih paruman Desa.

6. Desa kaepah dados pamaksan manut pamutus paruman desa lwiripun :

ha. Pamaksan Desa : ngamong utawi ngempon pura, Penataran Agung, Pura Pucak sari, Pura Pucak Tedung lan Pura Beji.

na. Pamaksan Kahyangan Tiga: ngamong utawi ngempon Pura kahyangan Jagat Kancing Gumi, Pura Desa Bale Agung, Pura puseh, Pura Dalem, Prajapati, Pura malanting, Tapakan lan kasanga.

ca. Pamaksan Subak: ngamong utawi ngempon Pura Penataran sari lan Pura Bedugul.

7. Banjare mawak tangan sukuning Desa, saha nyulurang tata pekraman, bacaan ayahan, laluputan, urunan, pengampel lan sakalwirnya.
8. Pamaksan wenang ngardi awig-awig sane mauger-uger antuk awig-awig Desa, katureksa tur sareng kalingga tanganin olih kelian Desa lumaksana sida kaangge.
9. Desa Adat utawi Banjar patut maduwe piranti mekadi Balai Banjar, Pura Malanting lan Kulkul.

SARGA II

PATITIS LAN PAMIKUKUH

Pawos 2

Desa Adat Batulantang ngamanggehang pamikukuh minakadi:

1. Pancasila.
2. Undang-undang Dasar 1945.
3. Tri Hita Karana manut Tattwa, Susila lan Upacara.

Pawos 3

Patitis Desa puniki lwire:

1. Mikukuhang miwah ngerajegang Sanghyang Agama
2. Nincapang parilaksana wargane ngamargiang Dharma Agama Hindu lan Dharma Negara.
3. Ngerajegang Sukertaning Desa saha pawongannya sekala lawan niskala.
4. Ngerajegang sangskaraning pawongan, pamekas sane ngilitang pakulawargan miwah sane mastikayang linggihnya ring pakraman.
5. Ngerajegang kassukertan druwen Desa miwah druwen pawongannya sami.

6. Nincapang Pangawruh, kasusilaan lan pangupa jiwa.

SARGA III

TATA PAKRAMAN

Palet 1.

Pawos 4.

Sang jumenek ring Desa Batulantang

Sang sane kabaos jumenek ring Desa Batulantang lwiripun :

1. Sahananing mapaumahan ring wewidangan Desa Adat
Batulantangsining wong Desa Batulantang.
2. Wong Desa inicap linggihnya soroh lwire :
 - ha. Wong Desa sane me Agama Hindu tur nyungkemin tur ngranjing
makrama, sinanggeh krama Desa
 - na. Anak, rabi kula gotra rob-robannya, sinanggeh warga Desa
 - ca. Sajaba sane munggah ring ajeng,(2,ha,na) sinanggeh tamiu.

Pawos 5

Pawilangan Krama.

Bacakan Krama lwire kadi ring sor :

1. Krama Ngarep, wong Desa sane nyakap karang Desa ngamong carik utawi
tegal, utawi tegal carik.

2. Krama Penyade, wong Desa sane wenten dandanan waris saking krama ngarep utawi krama paron.
3. Krama Paron, wong Desa sane nyakap karang desa kemaon.
4. Krama Pangele, wong Desa sane kakuwub ring krama ngarep utawi krama sane mawit saking dura desa, jenek saha tedun makrama.
5. Krama panyade, inggih punika krama sane sampun megat ayah kagentos antuk ahli warisnya.
6. Krama Balu , inggih punika krama sane silih sinunggil, rabi utawi istrine lina, wiadin nyapihin:
 - ha. Balu ngempu inggih punika : balu sane madue sentana dereng marabian.
 - na. Balu ngalintik inggih punika balu sane tan pasentana.

Pawos 6

Ngranjing dados Krama.

1. Ngranjing dados Krama kadi ring sor :
 - ha. Sangkaning nyakap karang Desa.
 - na. Sangkaning pinunas ring Desa Adat, manut pararem.
 - ca. Mawiwit sangkaning alaki rabi.
2. Panemaya tedun makrama nyabran sasih kasanga saha majalaran antuk tatengeran ring krama desa.

Pawos 7

Dharmaning Krama

Dharmaning Krama kadi ring sor :

1. Nyejerang saha tinut ring daging awig-awig.
2. Bakti kalih sutindih ring Desa.
3. Sareng ngutsahayang patitis Desa (Pawos 3.)
4. Natak tis panes marupa ayah lan urunan ngardi kabecikan Desa sekalaniskala.
5. Ngutsahayang ngemanggehang kawerdian tanem tuwuh,nyanggra wewalungan, Paksi muah sarwa perani, sane ngawinang Desane asri manut uger-uger Guru Wisesa.

Pawos 8

Wewenang Krama

Krama wenang polih pasayuban muah kasukertan rikalaning kakenaning panca baya kaungghang sajeroning awig-awig utawi pararem Desa, Banjar, Pamaksan sane marupa panyahcah awig-awig puniki.

Pawos 9

Dharmaning Tamiu.

1. Wong Desa sane sinanggeh tamiu patut ngawi kasucian miwah kasukertan Desane dudonannya manut pararem..
2. Tamiu sane me Agama Hindu sampun mapakuren patut nedunani ayah pasuka duka yan jenek langkungan ring nem sasih saha naur pangampel manut pararem.

3. Ayah pasukadukane marupa pamargi ngutsahayang kasukertan sekala niskala.
4. Sang tamiu polih pasayuban rikalaning katiben panca bhaya yan sampun nganutin kadi ring ajeng..

Pawos 10

Ayah kalih urunan

1. Krama ngarep wenang ngamedalangayah kalih urunan mepek uawi mamungkul.
2. Krama panyade, krama paron, krama pangele, miwah krama balu, ayah muah urunan kamanggehang manut pararem Desa.

Pawos 11.

Ayah Truna Truni

1. Ayah daha Truna kamedalang olih krama Desa.
2. Warga Desa sane sampun inucap daha utawi truna patut keni ayah daha truna.
3. Tedunnyane malarapan sekaha daha truna utawi truna truni.

Pawos 12

Laluputan

1. Desa mapaweh laluputan ayah utawi urunan :
 - ha. Ring sang kainggilang linggih.
 - na. Ring wargane sane kawelas asih, tan mampu, jompa.
 - ca. Ring wargane sane sampun lingsir mayusa langkungan ring 70 warsa, kaaraning nyada, kagentosin olih panyade.
2. Sor singgih laluputan muah ngawitin luput manut pararem.
3. Ring sasih kasanga bacakan leluputan katureksa tur kamanggehang olih kelihan/prajuru Desa.

Pawos 13

Mapuankid masuksukan, numbas ayah.

1. Krama kengin mapuankid saantukan sungkan, matepatin, laluasan, ngaluasang utawi ngaluang, mayadnya lan siosan.
2. Laminnya mapuankid manut pararem..
3. Kengin masuksukan antuk sang sane sampun daha wiadin truna.
4. Kengin numbas ayah, yan arang wenten ring purine utawi sane dados parayogya pagawai.
5. Panumbas ayah, agung alit kaetang nangken tahun, kamanggehang manut pararem.
6. Krama sane tan nganutin ayahan kadi ring ajeng (Pawos 13) wilangan kaping (1,2,3,4) kabaos nosa, dudonannya manut pararem.

Pawos 14

Wusan dados Krama.

Wusan dados Krama sangkaning :

1. Pinunas ngaraga sangkaning kesah kadura desa utawi ngalangkungin segara.
2. Kanorayang olih Desane santukan setata ngawe biota wiadin ngamandelin awig-awig Desa.
 3. Sulur utawi tata carane nganorayang Krama lwir ipun :
 - ha. Sampun pastika ring kaiwang-iwangannya makadi ngawe biota wiadin ngamandelin awig-awig.
 - na. Kasisipan katiwakin olih jurun Desa, minakadi kelihan Desa kelihan Banjar Adat, kelihan Pemaksan muah sedan penyarikan kasepekan manut pararem ring paruman Krama Desa.
 - ca. Yan sang kasepekan iwang tan cumpu ring tetepasan Desa Adat , kengin ngalanturangmapinunas ring pangadilan negeri.
 - ra. Yan sang kasisipan kawehin pangampura olih juru Desa, wong ika patut katiwakin danda, pangapok, dumogi sida malih tedun makrama Desa.
 - ka. Agung alit danda pangapok punika manut pararem.
4. Kapatutan sang wusan makrama :
 - ha. Yan ayah ngarep utawi ayah paron patut ngaturang karang ayahnya ka Desa.
 - na. Tan polih pahpahan druwe Desa, Banjar utawi Pamaksan.
 - ca. Tan polih pasayuban sajroning ala ayu.
 - ra. Prade sangkaning rahayu polih lekita bukti patilar saking praju

ru desa.

Palet 2
Pawos 15
Indik Prajurit Desa

1. Desa Adat Batulintang kaenter antuk kelihan Desa Adat.
2. Banjar miwah pemaksan kaenter antuk kelihan Banjar Adat muah kelihan Pamaksan soang-oang.
3. Sahanan kelihan mawiwit saking Krama Desa sane :
 - ha. Uning ring tata susila Adat Agama Hindu.
 - na. Madruwe hak pilih manut Undang-Undang pamilihan.
 - ca. Tan katempuh wicara pidana utawi perdata.
 - ra. Tan sungkan-sungkanan.
4. Kelihan Desa Adat patut keadegang olih paruman Desa, selamin-lamin ipun 5 (lima) warsa, tur kengin kapilih malih apisan.
5. Kelihan Banjar Adat muah kelihan Pamaksan keadegang olih paruman Banjar muah paruman pamaksan, selamin-lamin ipun 5 (lima) warsa tur kengin kapilih malih apisan.
6. Kelian DEsa, Kelian Banjar Adat muah Kelian Pamaksan ngawit ngamargiang swadarmannya soang-soang sesampune puput manggeh kapilih, saha puput atur pejati ring Kahyangan Desa..

Pawos 16
Panyanggrahan Kelihan Desa Adat.

1. Kelihan Desa Adat kasanggra olih :
 - ha. Patajuh utawi pangliman pinaka wakil.
 - na. Panyarikan pinaka juru surat.
 - ca. Sedahan pinaka juru raksa druwen Desa.
 - ra. Kelian Banjar Adat pinaka pengalancang pasuka duka.
 - ka. Kasinoman pinaka juru arah.
 - da. Saya pinaka pangelancang yadnya utawi piudalan .
 - ta. Pecalang panuntun kasutreptining desa.
2. Sajroning ngenterang sukerta niskala, Kelian Desa Adat mingsingghang Pamangku Kahyangan Desa.
3. Prajuru ngadegang panglingsir sinanggeh Kerta Desa..

Pawos 17.

Swadarmaning Prajuru Desa.

1. Swadarmaning Kelian Desa Adat muah Kelian Banjar Adat lwire :
 - ha. Ngalaksanayang sadaging awig-awig miwah sadaging pararem.
 - na. Nuntun kalih ngeterang Krama Desa rauhing sakaluarga Desa ngupadi patitis pawos 3.
 - ca. Kelian Desa Adat nyelidihi krama matemuang babaosan ring jaba jero.
 - ra. Nincapang kawarasan krama saha ngelestariang lingkungan lan budaya.
 - ka. Ngalanggengang karasmining Desa pakraman.
 - da. Nepasin sakaluwiring wiadin mauger-uger awig-awig.
2. Prade prajuru iwang panglaksana keni pamidanda nikel ring kaiwangan soang-soang krama manut pararem.

Pawos 18

Olih-olih utawi patias Juru Desa.

Prajuru Desa polih olih-olih utawi patias kadi ring sor :

1. Upon- upon tanah pecatu.
2. Luput pakenan-kenan manut pararem.
3. Cenengan sahanan duman ring Desa, Banjar muah Pamaksan.
4. Solasan presenan saking pikolih usaha krama.
5. Patias siosan manut pararem.

Pawos 19

Pangentosan Prajuru.

Prajuru Desa wenang kagentosin :

1. Saan tukang seda.
2. Saantukan sampun panumaye, manut palet 2, pawos 16 angka 4,5,
3. Wit saking pinunas manawi tan prasida ngayah santukan keni pinungkan rahat langkungan ring awarsa, balu, muah sapanunggilannya..
4. Kanorayang santukan nilar sesana.
5. Ngentosin wiadin nganorayang prajuru patut sajeroning paruman Desa tur kaingkupin krama desa.

Palet 3

Pawos 20

Indik Kulkul.

1. Ring wewidangan Desa Adat Batulintang, wenten kukul petang soroh :

ha. Kukul Pura.

na. Kukul Desa/ Kukul Banjar.

ca. Kukul Pamaksan.

ra. Kukul sekaa.

2. Kukul wenang anggen Pengrasi Yadnya miwah tatenger midabdabin kramanya

soang- soang manut dudonan.

3. Kukul Pura miwah kukul sekeha tan wenang nyawerin swaran miwah tatepakan

kukul Desa wiadin kukul Banjar.

Pawos 21

Tata Tatepakan.

1. Tabuh tatepakan kukul Pura pinaka pangarsin yadnya, tung-ting banban ngembat.

2. Tabuh tatepakan kukul Desa utawi Banjar, manut tatujon soang-soang kadi ring sor

ha. Upacara Dewa Yadnya, tung-ting.

na. Upacara Bhuta Yadnya. cecandetan.

ca. Makarya miwah Parum, kalih tulud ngembat.

ra. Rare embas, limang klentungan ngembat.

ka. Kelayu sekar, tigang klentungan.

da. Pengangkatan, petang klentungan.

ta. Geni baya, bulus atulud maweweh ngembat.

sa. Plagandangan, bulus kalih tulud.

wa. Kabaak, kaamuk muh sahanan baya pati, bulus tigang tulud.

la. kukul buwung enem klentungan.

3. Tatengeran geni baya utawi baya pati kadi ring ajeng, (wialangan (2) ak

sara ta lan wa) patut katangurin olih Kukul Banjar siosan.

4. Kukul sekaa-sekaa, samaliha kukul pondokan tan kalugra nyawerin (matchin) tengeran kukul Desa/Banjar, prade mamurug keni kadanda manut pararem.

Pawos 22

Kukul Katepak

1. Kukul Desa utawi Kukul Banjar katepak sangkaning pituduh prajuru Desa utawi Banjar manut wiguna.
2. Sang nepak kukul sangkaning baya plagandang, kabaak, kaamuk, geni bhaya, utawi baya pati lianan, patut gelis supeksa ring prajuru.
3. Krama Desa muah Banjar patut nedunin suaran kukul saha makta piranti manut tetengeran tur lumaksana katuntun olih prajuru.
4. Suaran kukul tatengeran baya patut katedunin olih sahanan krama lanang rauhing ayah pasukadukan muah tamiu.
5. Yan tan nedunin suaran kukul, nosa kearan, keni kadanda agung alit manut pararem.

Pawos 23

Kukul katepak sangkaning tan gumanti.

Yan wenten jatma nepak kukul sangkaning manah iseng, tan gumanti manut tatengeran pawos 21, wilangan kaping 1 lan kaping 2, aksaha ha jantos la , keni jatma ika danda agung alit manut pararem.

Palet 4

Pawos 24.

Indik Paparuman.

1. Paparuman ring Desa Adat Batulantang lwire :

ha. Paruman Desa

na. Paruman Banjar.

ca. Paruman Pamaksan.

ra. Paruman prajuru Desa utawi para manggala Desa manut wiguna.

ka. Paruman sekaa Truna-Truni, sekaa gong, seka santi, saha sane siosar manut babuat.

2. Paruman Desa, Banjar, Pamaksan miwa sekaa Truna-Truni pucuking kawisesan ring wewidangan soang-soang. Paruman Desa pinaka murdaning kawisesan tan kesaman.

3. Paruman Prajuru Desa muah Banjar sinanggeh sraya bebantun matetimangan ring keliannya soang-soang.

Pawos 25.

Ngamargiang Paruman.

Paruman ring Desa Adat Batulantang kamargiang kadi ring sor :

1. Paruman panamaya nyabran ngasasil, nemoning rahina Anggara keliwon utawi Anggarkasih.

2. Paruman napkala utawi nadak saantukan wenten bebaos mabuat.

3. Paruman satunggil awarsa, nyabran sasih kasanga, maosang munjuk lumgsur

pakraman, ayah-ayahan druen desa miwah sane sios-siosan manut kawigunan.

Pawos 26.

Tata Titi Peparuman.

1. Sang sane ngamiletin parum patut mabusana adat, mawastra, lan nyelempot.
2. rikalaning parum patut ngawentenang cane saha runtutan ipun, magenah ring ajeng sang rumaos, saha ngaturuningayang ring Ida Bhagawan Panyarikan.
3. Maka jagi pangawit kalaksanayang sepan-sepan saha riwusannya nyacah dadosan gung alit manut pararem.
4. Tan kalagra makta gagawan, ngawetuang suara ghora utawi byuta, yan wenten keni pamidanda gung alit manut pararem.

Pawos 27.

Ngawit Paruman.

1. Paruman desa utawi banjar utawi pamaksan prasida lumaksana yan sampun katedunin antuk sang patut ngamiletin langkung ring aparo.
2. Yaning krama sane prasida tedun nenten wenten langkungan ring aparo, paruman punika kawangdeang tur kawawanin malih 7 (pitung) rahina.
3. Manawi paruman sane kaping 2 (kalih) taler tan jangkep aparo langkung rauhipun, paruman kalanturang tur pamutus paruman sah, yaning sane kabaosang patch kadi indike duk paruman sane kawangdeang.

Pawos 28.

Pamutus Paruman

1. Papatutan paparuman krama sinanggeh sah, yan sampun kacumponin antuk bebaos briuk sapanggul (ingkup) utawi kacumponin langkungan ring aparo krama sane ngamiletin parum.
2. Prade pidaging paruman tan kacumponin mangda prajuru Desa/Banjar/Pamaksan ngilikang babaos, saha putusanian mangda kararemang antuk krama desa/banjar/pamaksan, malih tan prasida kasungkemin jantos ping tiga, prajuru wenang nunas baos ring Kerta Desa manut undagan.
3. Pamutus paruman prajuru desa tan kawenang ngwedalang tategenan ring krama sadereng kaingkupin antuk krama sajeroning paruman, sawawaning pamutus ngwetuang pasuara maka pidaging pituduh sang ngawewenang utawi ngonekang pecak pararem..

Palet 5.

Pawos 29.

Indik Druwen Desa.

Padruwen Desa Adat Batulantang minakadi :

1. Panyiwian utawi Kahyangan Desa minakadi :

ha. Pura Desa Baleagung.

na. Pura Puseh.

ca. Pura Dalem, Pangulun Setra.

ra. Pura kahyangan Jagat Kancing Gumi.

ka. Pura panataran Agung.

da. Pura pucak Sari.

- ta. Pura Beji.
- sa. Pura Malanting.
- wa. Pura Panataran sari.
- la. Pura bedugul.

2. Pratima Pralingga:

- ha. Ratu Mas sakti (Barong Rentet) Pralinggalan Ida Betara Wisnu.
- na. Ratu Rarung pralinggalan Ida Betara Brahma.
- ca. Ratu Niang pralinggalan Ida Betara Iswara.
- ra. Ratu Ketut pralingga Ida Betara Maha Dewa.
- ka. Pura Kahyangan Jagat Kancing Gumi, Betara Sang Hyang Siwa pralingga
Naga Taksaka
- da. Pura Desa, Betara Brahma, pralingga Wilmana.
- ta. Pura Puseh, Betara Wisnu, pralingga Garuda.
- sa. Pura Dalem, Betara Siwa, pralingga Lembu Nandini.
- wa. Pura Ulun Setra, betara Prajapati, pralingga warak.
- la. Pura Pamaksan Agung, Betara singsir, pralingga Naga.
- ma. Pura Pucak Sari, Betara Giripati, pralingga macan.
- ga. Pura Malanting, Betara Srisedana.
- ba. Pura Penataran Sari, Betara Srisedana, pralingga kuda unci srawa.
- nga. Pura Bedugul, Betara Sri Gangga Dewi.

3. Sarana Upakara Iwire: cecepan, tapakan taenan, tabuhan, rantasan lan sapanunggilannya.

4. Wastra, busana lan sapanunggilannya:

- ha. Wastra soang-soang pclinggih ring kahyangan Desa.
- na. Busana juru songsong sesolahan Ratu Mas Sakti, Ratu Rangda, Ratu
Lingsir (Ratu Niang), Ratu Ketut.
- ca. Busana sasolahan Sang Hyang Babuang
- ra. Tedung, umbul-umbul/lelontek, kober lan sapanunggilannya.

5. Piranti-piranti Desa Adat minakadi : Bale Desa utawi Bale Banjar, Bale Kukul, Bale Wantilan, lan wewangunan siosan.

6. Gong ilen-ilen Pura minakadi : rejang, pebdet, babuang, lan sane siosan.

7. Tanah Desa kapah dados :

ha. Tanah karang Desa inggih punika tanah sane wenren sajeroning Desa pakraman, utawi pakarangan 4,1831 Ha. kaparang dados tigan; palih lwire

1. Karang suci, tanah tegak marajan utawi sanggah.
2. Tanah tegak paumahan genah pawongan : puaregan, kulumpu lan sapanunggalipun.
3. Tanah teba, genah wewalungan, pajedogan (WC), ngutang leluhu, tetanduran, lan sane siosan.

Yan sang nanggung karang Desa puniki padem, karang punika katibakang ring sentanaipun, madudonan karihinin krama penyade, sane pinih nampek panyaman. Yan kaputungan karang punika kalaliang ka Desa utawi katibakang ring warga Desane sane patut manut pamutus pararem Desa.

na. Tanah setra 0,4083ha.

ca. Tanah laba.

(1). Tanah sawah malinggah 1,6744 ha.

(2). Tanah tegal malinggah 1,1780 ha.

8. Lekita-lekita, lwire pipil, awig-awig, paswara/pararem, niasa (lambang).

9. Lembaga Perkreditan Desa (LPD) anggotannya krama desa sami.

10. Arta brana sane kapikolihang saking ;

ha. Urunan krama.

na. Dadosan, pamidanda rauh panikel-panikelnya.

ca. Paica saking guru wisesa.

ra. Dana punia siosan sane patut.

ka. Pikolih usaha Lembaga Perkreditan Desa.

Fawos 30.

Paupon-upon Laba.

1. Paupon-upon laba Pura kalih druwen desa kaenterang olih prajuru Desa, minakadi sedahan penyarikan.
2. Pikolih lan upon-upon tanah laba patut kaangge prabeya odalan, pawangunan muah sios-siosan, manut kawigunan ipun.
3. Nyabran sangkepan ipara juru sane ngamong druwen Desa patut nyiarang munjuk lungsur druwen Desa.
4. Sakalwiring druwen Desa patut wenten ilikitan ipun.
5. Tan kalugra ngingsirang/ngicalang druwen Desa minakadi ngadol, ngalah-alah, ngadeang yan tan polih panugrahan saking ikrama Desa.

SARGA IV

SUKERTA TATA AGAMA

Palet 1

Pawos 31

Indik Dewa Yadnya

1. Kahyangan utawi palinggih panyiwian sawewidangan desa adat Batulantang luire:

- ha. Kahyangan Jagat kancing Gumi.
- na. Kahyangan Tiga : Pura Desa/Baleagung, Pura puseh, Pura dalem, Pangulun Setra.
- ca. Pura panataran Agung..
- ra. Pura Pucak Sari.
- ka. Pura Beji.
- da. Pura Malanting.
- ta. Pura panataran Sari.
- sa. Pura Bedugul.
- wa. Tapakan Ratu Mas Sakti, Ratu rangda, Ratu Ketut lan sane tiosan.

2. Rahina Piodalan soang-soang kahyangan inucap, kadi ring sor:

- ha. Kahyangan Jagat Kancing Gumi rikala rahina Buda Umanis wuku Prangbakat.
- na. Kahyangan Tiga luire:
 1. Pura Desa/ Bale Agung rikala rahina Buda Umanis wuku Prangbakat.
 2. Pura Puseh rikala rahina anggara keliwon/anggara kasih wuku julungwangi.
 3. Pura dalem- Pangulun Setra rikala rahina Buda wage wuku Manail.
- ca. Pura panataran Agung rikala rahina soma pon /soma ribek wuku sinta.
- ra. Pura pucak sari rikala rahina Saniscara kelion/ tumpek wuku landep.
- ka. Pura Beji rikala sukra kelion / sugian Bali, wuku sungsang.
- da. Pura malanting rikala buda wage/buda cemeng kelau.

ta. Pura panataran sari rikala Buda Kelion/Pagerwesi wuku Sinta.

sa. Pura Bedugul rikala nemoning Anggara Kelion/Anggara kasih.

wa. Tapakan Ratu Mas Sakti, Ratu Rangda, Ratu Ketut rikala Buda umanis wuku Prangbakat.

3. Pangaci ring Pura inucap manut kecap sastra agama, saha kalaksanayang nista, madia, utama manut kawentenan lan pararem.
4. Soang-soang pura inucap kaempon olih krama pamaksan, ayah, urunan lan sane siosan madudonan manut pararem.
5. Siosan ring rahina piodalan soang-soang kahyangan desa kadi ring ajeng (wilangan kaping 2 aksara ha jantos aksara wa) ikrama desa patut ngaturang puja wali nemonin rerahinan soma ribek, pagerwesi, saraswati, sugian jawa, sugian Bali, galungan, Kuningan, Tumpek miwah sapanunggalipun.
6. Ring Buda Kliwon Dungulan/Galungan, sajaba cuntaka, patut mamenjor ring lawangnya soang-soang pepek saha upakarannya. taler ritatkala wenten piodalan agung manut dedauhan.
Yan wenten jatma tan nganutin kadi ring ajeng, wenang kadanda agung alit manut pararem.

Pawos 32.

Pamangku.

- 1 Ring soang-soang pura patut kawentenang pamangku.
- 2 Ngadegang pamangku manut dudonan ;
ha. Nyanjan utawi Nunas pawuwus Widhi mapiteges mapinunas ring ajeng Panataran Pura, masemuang, ring Balian Sonteng, lan sapanunggalnya.
na. Turunan utawi ngwaris.

ca. Kacatri, kapilih, katunjuk olih Krama Desa.

ra. Dudonan pamargi ngadegang Pamangku kadi ring ajeng manut pararem.

3. Tan kawenang kaanggen pamangku lwire:

ha. Cedanga, lwire : peceng, perot, cungh, lan sapanunggalannya.

na. Kageringan makadi sakit ila, ayan, buduh wiadinm edan.

4. Prabiya ngadegang pamangku :

ha. Madiksa Widhi (ngawintenin) kamedalin saha kalaksanayang antuk sang ngadegang makadi krama desa utawi pamaksan pura soang-soang.

na. Yaning kulawarga ring paumahan utawi pakarangan Jero Mangku wenten kalayu sekar,, wenang ipamangku ika nyepuh, prabia kamedalang olih pamangku.

5. Pamangku patut ngamanggehang sesananing pamangku, lwire tan wenang ajuden miwah sane siosan.

Pawos 33.

Dharmaning Pamangku.

1. Swadharmaning Pamangku lwire:

ha. Nitenin, nuntun kasucian ring kahyangan.

na. Ngenterang upacara piodalan ring kahyangan, utawi ring soang-soang pakubon krama.

ca. Tan wenang salab-sulub ring genah sane sinanggeh kaon utawi leteh, yan mamurug wenang pamangku inucap nyepuhin raga.

ra. Prade silih sinunggil pamangku kapialang utawi cuntaka, kengin nyelang pamangku siosan, sajroning pamangku kahyangan desa katuntun olih prajuru.

ka. Samalih yan sampun pamangku ngayah ring pura, kancit wenten kulawarganya li

na, pamangku inucap tan keneng cuntaka, sakewanten pamangku tan budal salami piodalan.

2. Yan wenten sang mapenauran mangda masadok ring prajuru sadurung kaantebing.
3. Panauran marupa arta brana sami dados druwen Desa.
4. Pamangku rikalaning ngenterang upacara, lanang lan istri patut mabusana sarwa putih.
5. Patias utawi olih-olihan Pamangku lwire:
 - ha. Pahan sarin banten.
 - na. Luput pakaryan lan rerampen.
 - ca. Lan sane siosan madudonan manut pararem.

Pawos 34.

1. Pamangku kagentosin riantukan:
 - ha. Lina.
 - na. Pinunas ngraga manawi kageringan lan sapanunggalnya.
 - ca. kawusang antuk krama manawi malaksana sane tan patut (asta dusta).
2. Prade pamangku kawusang sangkaning malaksana asta dusta, keni pamidanda agung alit lan dudonannya manut pararem.

Pawos 35.

Kasukertan Kahyangan ring desa:

1. Sane nenten kalugra ngaranjing ka Pura lwire :
 - ha. Sang katiban cuntaka, makadi sebel raga:
 - (1). Sebel kandel, ngraja sewala, salami dereng mabersih.
 - (2). Sebel madrue putra, sajroning 42 rahina, kruron.

- (3). Sebel pangantenan sadereng mabyakala.
- (4). Sebel sangkaning kapademan manut sengker.

na. Sang patita utawi panak babinjat.

ca. Makta sahananing sane kasinanggeh ngaletchin.

ra. Wawlungan suku pat, sajawaning rikala mapapada.

ka. Mabusana sane tan manut kadi tata caraning ngranjing ka pura.

da. Anak alit sadereng mayusa tigang sasih.

ta. sadereng polih wak-wakan (pituduh) prajuru desa adat/pakraman.

2. Busana ngranjing ka pura wenang nganutin dresta minakadi :

ha. Ritakala ngaturang ayah, mawastra lan nylempot.

na. Ritakala ngaturang sembah mabusana jangkep.

ca. Siosan kadi ring ajeng nenten kalugra, sajawaning sampun pituduh prajuru.

3. Pari laksanakan tan kawenangang ring pura lwire:

ha. Masuara sane kasinanggeh wak purusia, wak capala.

na. makoratan/mabacin, mawarih, masanggama.

ca. Masumpah utawi macoran sajawaning pituduh prajuru desa.

ra. Ngias raga sajawaning pandita miwah pinandita.

ka. Munggah tedun ring palinggih sajawaning pituduh prajuru desa.

da. Jatma lanang wadon sampun daa truna sirep dados asiki sajroning pura.

4. Sang mamurug kadi kecaping ring ajeng keni pamidanda pamrayascita agung alit manut pararem lan sastra agama.

Pawos 36.

1. Yan wenten jatma karauhan ring pura, kengin kapintonin prade rumasa kasumangsayan, yan tan wiakti, jatma inucap kasisipang manut pararem.

2. Prade kahyangan kahanan durmangala minakdi kapanca bhaya lwire:
 - ha. Kasamber kilap, katiben angin tur pungkak.
 - na. Karubuhan taru agung.
 - ca. Katiben lulut.
 - ra. Karanjingan pandung.
 - ka. kasiratin rah manusa.
 - da. Kalebon amuk lan sapanunggalnya.
3. Pamangku patut digelis nyadokang ring prajuru mangda marumang kramu
desa tur ngawentenang upacara sapatutnya manut sastra agama.

Palet 2

Indik Resi Yadnya

Pawos 37

1. Sang pacang maduwi jati patut kadi ring sor :
 - ha. Sang pacang mapudgala utawi madwijati, sajawaning nunas panugrahan
ring sang awenang, parisadha utawi kantor Agama, taler patut masadok
ring kelian Desa.
 - na. Prajuru inicap patut nitenin, nureksa manut kecaping agama sekadi
cedangga, pelaksanannya makadi sad tatayi lan sapanunggal ipun, saha
nyaksini upacara nyane.
 - ca. Sapupute iprajuru patut digelis ngentosin parab sang madiksa ring
sahananing ilikita, antuk biseka kawikon manut panugrahan nabenya, saha
kasiarang ring Banjar muah Desa.
2. Sang pacang mawinten madeg pinandita patut kadi ring sor :
 - ha. Sang pacang mawinten madeg pinandita, sane ngalokapalاسraya pamang

ku, balian sonteng, dalang lan sapanunggalipun, patut sangkaning polih kabebasan saking kelian Desa Adat.

na. Kelian Desa Adat mangda mastikayang laksana lan upacaranya manut drestakalih sastra agama, tur pamuputnya mangda kasiarang ring Desa muah banjar.

ca. Desane katuntun antuk parajuru mangda mastikayang sahanan pinandita ajeg, jejer kasuciannya, anut ring sesana.

ra. Prade wenten sane timpang kelian desa patut maosin saha niwakin manut sastra agama.

Palet 3

Indik Pitra Yadnya

Pawos 38

Indik pitra yadnya madudonan kadi ring sor:

1. Pangupakaran sang lina:

ha. Makingsan ring Ibu Pertiwi utawi ring agni salaminnya kantun nutupang prabya, makacihna patut ngaturang pajati ring pura Dalem, Prajapati, Tengahing Setra, Ibu Pertiwi, upakarannya manut sastra agama.

na. Atiwa-tiwa wiadin ngaben utawi palebon.

ca. Ngaben nglungah, sane wenang kaabeng nglungah, jadma padem sampun macihna lanang wadon.

ra. Jadma sane kaabenang nglungah, wiadin padem sadurung mayusa 3 sasih, tan patut kalanturang antuk nyekah.

ka. Jadma padem sane sampun maketus, patut kalanturang antuk nyekah.

da. Makingsan ring pertiwi durung maupakara mendem lan atur pejati, manawi benjangan wenten jatma kalayu sekar, prasida kaabenang, sadurung upakara ngaben kalaksanayang, patut upakara makingsan ring pertiwi kapuputang riinan.

2. Riwus kaabenang patut patut ngamargiang upakara pitra yadnya munggah daun bingin (ngaroras), lan sapanunggilnya wawu ngalinggihang Dewa Hyang (Bhatara-Bhatari).

Pawos 39.

1. Swadarmaning Sang Kahanan Kamatian patut:

ha. Sang kahanan kamatian patut masadok ring i prajuru Banjar muah Desa.

Pamekas ring kelian Banjar Adat nunasang indik pamargi utawi sang wiku.

na. Ngaturang krama banjar ngrombo makarya eteh-ete sawa kaduluirin panyembrana canang sasidan antuk.

2. Swadarmaning banjar:

I prajuru patut maritatas pamargin sang kaduhkitan, sasampun tatas kalanturang nepak kulkul manut pawos 21 angka 2 aksara ka maka cihna warga Banjare wenten lampus.

3. Panyanggrahan Banjar selanturnyane kadi ring sor :

ha. Soang-soang krama nedunin ngamedalang patus agung alit manut pararem.

na. Krama lanang istri makarya manut dresta lan pararem.

ca. Busana sane lanang mawastra saha nyalempot, sane istri mawastra masesenteng, warna selem.

ra. Sami krama banjar ngater ka setra jantos pamemdeman utawi ngeseng puput.

ka. Pamargin sawa miwah upacarannya mangda dabdab, antar tan kalugra magarap.

Pawos 40

Tan Wenang nepak kulkul kahanan Kamatian.

1. Tan polih panyanggra Banjar miwah swaran kulkul yan upakara sawa nyarengin
Yadnya Desa makadi :
 - ha. Tatkala Ida Bhatara ring panyiwian Desane sakantun ngadeg.
 - na. Tatkala wenten matatangun sane mabuat.
 - ca. Tatkala wenten dewasa kekeran Desa sane siosan.
2. Kala asapunika upacara sawane kasanggra olih krama pangapit lan penumbak.
3. Pamargine kasetra sasampun surup surya tur matanem ugi (mendem pakingsan).
4. Prade nemoninrahina piodalan ring kahyangan tan kalugra pangutangane.
5. Prade wenten murug kecape ring ajeng kadanda agung alit manut pararem.

Pawos 41

Indik Setra.

1. Krama Desa Adat Batulantang ngangge setra asiki.
2. Sane wenang ngangge setra ring Desa Adat Batulantang sang meagama Hindu.
3. Kelian Desa wenang nitenin sang nganggen setra saking drestane, maka bantang ngertiang kasucian Desane mangda tan jantos sandung ngirim wangke lan sapanunggal ipun.

Pawos 42

Pamargin mendem-ngeseng.

Pamargin mendem utawi ngeseng sawa nganutin dewasa, tan wenang kadi ring sor,
Semut sadulur, Kala gotongan, Pepedan, Pasah, Perwanj, Purnama, Tilem,
nyandung, rerahinan jagat, rikalaning piodalan Ida Bhatara kantun ngadeg, ngajang
layon miwah seos-seosan.

Pawos 43

Ngalangkar Watang

1. Yan wenten makutang ngamarginin margi asiki, dina tunggal, tan wenang sane
ungkuran ngalintangin sane dumunan, patut sane dumunan ngempetin setra
mamargi dumunan.
2. Yan wenten jatma mamurug kadi ring ajeng, patut kadanda agung alit manut
pararem kalih sastra agama.

Pawos 44

Sawa tan wenang inepang kalih tan keni larangan.

1. Anak alit durung maketus.
2. Sang keni sungkan ila pinyungkan ngelalah kadi kolera, lan sapanunggal ipun.
3. Ring kalaning jagat keni gering gerubug.

Pawos 45

Pananjung Batu.

1. Yan wenten sawa dura Desa, Jatma seos Desa, matanem wiadin ngeseng sawa ring setra Desa Adat Batulantang patut keni pananjung batu, agung alit manut pararem.
2. Pananjung batu punika ngranjing ka Kas Desa (dados padruen Desa).

Pawos 46.

Tata kertaning ring setra.

1. Tan wenang makarya undag-undag gumanti sane mawasta kuburan langgeng.
2. Tan wenang nginepang bangbang.
3. Tan wenang nunjel miwah nanem sawa tatiga arahina ring setra tunggal. Yan wenten mamurug kadi ring ajeng keni kadanda, agung alit manut pararem kalih manut sastra agama.
4. Tan wenang malebeng matah, teges ipun, ngeseng/ ngaben miwah nanem arahina ring setra tunggal.

Pawos 47

Ulah pati, Salah pati.

Padem ngulah pati, salah pati mangda kapreteka nganutin sastra Agama upacaraane madudonan kadi ring sor:

1. Makarya pangulapan.
2. Layon dados kabakta budal.
3. Upacara sekadi padem biasa.

4. Taler nenten ngirangin pamutus sang muputang sane kaanggehang.

Pawos 48

Cuntaka Sebel.

Cuntaka sebel wenten kalih pawos :

1. Cuntaka saking padewekan makadi ngaraja sewala karuron rare durung masambutan, nganten durung pawiwahan (makalan-kalan) gamya gamana, jadma beling nenten wenten ngangkenin, mamitra ngalang, panak babinjat durung wenten mamas, durung maprayascita.
2. Cuntaka saking kalayu sekar, kamatian.

Pawos 49

Swennyng ngambil sebel cuntaka.

1. Cuntaka saking padewekan pangambilan ipun kadi ring sor:
 - ha. Sebel saking ngaraja sewala ipun sakantune ngamedalang rah.
 - na. Sebel saking maduwe oka suwen ipun 42 dina, lanang jantos kepus udel.
 - ca. Sebel saking karuron suwen ipun 42 dina.
 - ra. Sebel saking rare wawu mijil suwen ipun tigang sasih.
 - ka. Sebel saking nganten suwen ipun selamine durung pawiwahan.
 - da. Sebel saking gamya selamine durung kapuputang manut dresta kalih sastra agama.

ta. Sebel saking gamya agama suwen ipun sadurung kapuputang manut dresta kalih sastra agama.

sa. Sebel saking jadma beling nenten wenten ngangkenin suwen ipun selamine durung pawiwaha.

wa. Sebel saking mamitra ngalang suwen ipun selamine durung pawiwahan.

2. Cuntaka saking kalayu sekar, kamatian kadi ring sor:

ha. Yan sangkaning sameton banjar pangambile ngawit saking paswaran kulkul jantos maprayascita, pangambile kadi agni pangambilan sebele sadurung pangutangane ngawit saking paswaran kulkul pawos 21, angka 2 semalih sampun pangutangane malih tigang dina wawu maprayascita.

na. Yan kaabenang pangambilan sebele ngawitin swaran kulkul jantos pangutanganne malih tigang rahina maprayascita, sebele ical.

ca. Yan kalugra ngarep pamuput ngaben pangambilan sebele saking ngawit padem jantos pangutanganne risampun mapegat lan maprayascita sebele ical.

ra. Yan makingsan ring pertiwi, agni, pangambilan sebele kadi ring sor :

- Kulawarga ngarep, saking padem sakirang ipun 12 rahina saking pangutanganne.
- Kulawarga tan ngarep, saking padem sakirang ipun 3 rahina saking pangutanganne.

Pawos 50

Tan keneng cuntaka metu saking kamatian.

Sane tan keneng cuntaka makadi :

1. Sang sane maraga putus, makadi sang pandita miwah pamangku.
2. Rikalaning ngaturang Dewa Yadnya sampun mapangalang sasih.

3. Banjar tan keneng sebel sadurung kulkul maswara manut pawos 21 angka 2.

Palet 4

Pawos 51

Indik Manusa Yadnya.

1. Manusa yadnya inggih punika upacara wiadin upakara darmaning manusa ngawit saking patemoning kama petak kelawan kama bang sajeroning garba utawi waduk ibiang ngantos lampus riwekas.
2. Upacara lan upakara kadi ring ajeng madudonan kadi ring sor:
 - ha. Magedong-gedongan, duk panerempinin, bobotan mayusa tigang sasih jantos petang sasih.
 - na. Duk sang kamareka wawu embas.
 - ca. Kepus udel.
 - ra. Ngelepas aon disampune mayusa roras rahina.
 - ka. Akambuhan disampune mayusa 42 rahina.
 - da. Tigang sasih nyambutin.
 - ta. Pawetonan disampune mayusa enem sasih.
 - sa. Ngempungin rikala tumbuh untu.
 - wa. Maketus, upakara sesayut pengerti suara.
 - la. Munggah daha teruna macihna : yan lanang ngembakin, yan istri sampun ngaraja sewala.
 - ma. Mapandes, matatah.
 - ga. Mawiwaha madengen-dengen.
 - ba. Mawinten sapanunggal ipun.
3. Upakara inucap nista, madya, utama nganutin kawentenan sang manggalaning

yadnya nganutin sastra agama lan dresta.

4. Krama sane ngembasin rare kawarangan sangkaning arus, mangda masadok ring Kelian Banjar. Nian inucap ngilikitayang saha nepak kulkul manut pawos 21 wilangan kaping 2 aksara ra.

Palet 5

Indik Bhuta Yadnya.

Pawos 52

1. Bhuta Yadnya inggih punika upacara-upacara biakala ring pertiwi lan kahyangan, sarwa prani saha upacara-upacara ring babutan.
2. Upakara pabiakala ring sarwa prani lwire :
 - ha. Ring sarwa tumuwuh rikala Tumpek Pangatag (Saniscara Kliwon Wariga).
 - na. Ring sarwa ingon-ingon rikala Tumpek Kandang (Saniscara Kliwon Uye).
 - ca. Upacara pakalan-kalan manusa manut wiguna kabawos pabiakala.
3. Upacara pabiakala ring ibu pertiwi, kahyangan lan babutan kawastanin macaru.
4. Caru inucap nista, madya, utama manut kawigunan kadi ring sor :
 - ha. Masaiban, ngejot/yadnya sesa, nyabran rahina sawusan ngarateng.
 - na. Eka sata.
 - ca. Panca sata.
 - ra. Panca sanak.
 - ka. Tawur Agung.
 - da. Resi gana.

ta. Panca kelud.

sa. Balik sumpah.

Pawos 53

Tawur Kasanga.

1. Tawur kasanga ngangken ngwarsa wenten kaitan ipun ring penyepian, madudonan kadi ring sor :

ha. Yan tan wenten paitung sewos, tigang rahina sadurung panyepian patut melis, melasti pratima Ida Bhatara kasuciang ring segara utawi ring beji, wus punika nyejer ring bale agung.

na. Ring tilem sasih kasanga kawentenan tawur kasanga ring pempatan agung, tur kawentenan pacaruan alit ring soang-soang paumahan manut sastra agama, ketah kabaos ngrupuk, maka cihna pacang mapag rahina panyepian benjangne.

ca. Ring pananggal apisan sasih kadasa, kawentenang panyepian.

Daging brata panyepian kadi ring sor :

(1). amati geni, tan kengin maapi-api, sajawaning anak madue oka alit,

matepatin ring genah rare. Sang matepatin sungkan ring genah sungkan, sang madruwe layon.

(2). amati karya, tan wenang nyambut karya.

(3). amati lalungan, tan wenang ngawentenang tatabuhan lan sapanunggal ipun.

(4). amati lalungan, tan wenang malalungan sajawaning ipara juru tur mangda acaciran wiadin ilikita.

2. Pabratan inucap, kamargiang saking semeng ngantos ngedas lemah.

3. Prade wenten murug keni pamidanda agung alit manut param.
4. Ring manis panyepian kawastanin ngembak, maka cihna pangawit isaka warsa patut soang-soang warga desa sami saling ngaksama (dharma santhi).

SARGA V

SUKERTA TATA PAWONGAN

Palet 1

Pawos 54

Pawiwahan.

1. Pawiwahan inggih punika patemoning purusa lawan pradana, sakalan ipun panunggilan suka cita lan langgeng, satya alaki rabi, saha kadulurin upasaksi sekala niskala.
2. Pamargin pawiwahan kadi ring sor:
 - ha. Papadikan, kamanggala antuk pakrunan rihinan.
 - na. Ngarorod, ngarangkat pangambilan rihinan wawu kaetut antuk pakrunan.
 - ca. Nyeburin utawi sentana nyeburin, risampune kategepin antuk upakara lan upacara.
3. Pidabdab sang pacang marabian patut :
 - ha. Nganutin sakadi sampun daha teruna (prasida nganutin undang-undang perkawinan).
 - na. Sangkaning sami pada rena (tan kapaksa).
 - ca. Prade pangambile seos agama, juru desa mangda netesang aga

ma sane kajejerang sang pradana bilih-bilih prasida maagama Hindu

kadulurin ilikita

tur kamanggala antuk kasudiang upakara pawijilan, nistan ipun upakara

panyambutan.

4. Pamargin parabian inucap mangda nganutin undang-undang perkawinan saking sang ngawiwenang.

Pawos 55

Pawiwahan Manggeh sah.

1. Pawiwahan kamanggehang sah maka cihna tri saksi makadi :
 - ha. Dewa saksi, Widhi widana katur ring Sang Hyang Widhi.
 - na. Bhuta saksi, Widhi widana ring sang butha kala, sanistan mabyakala, makalankalan.
 - ca. Manusa saksi, kasaksinin olih kaluarga pamekas olih prajuru sane mapakilingang utawi ngilikitayang katumusang ring sang ngawewenang.
2. Upakaran ipun manut sastra agama kalih dresta, agung alit manut kawentenan sang manggalaning yadnya.

Pawos 56.

Pangambilan Pawiwahan Tan Patut.

1. Pangambilan pawiwahan tan kapatutang ring Desa Adat Batulantang lwire :
 - ha. Ngambil saking papaksan.
 - na. Ngambil gamia-gamana
 - ca. Pawiwahan tan paupasaksi sakala niskala.

2. Yan wenten jadma malaksana kadi ring ajeng jadma ika wenang kapalasang tur kadanda mrayascita jagat agung alit lan dudonannya manut pararem kalih sastra agama.

Pawos 57

Tata caca parabian nganutin

1. Papinangan utawi papadikan pangambil pamargine patut madudonan kadi ring sor :

- ha. Pinih riin sang daha patut kaarsayang, kapadik ring reraman kulawarga sang lanang.
- na. Pakrunan jantos ping tiga: kapertama antuk canang, kaping kalih antuk canang lan sajeng, kaping tiga tipat bantal, kabawos pamuput papadikan.
- ca. Risampune puput babaosane, sami pada adung pamekas sang daha kalawan sang lanang. Ring pangambilane patut sang daha mapamit ring pamrajan, sanggah miwah ring guru rupakannyane, malarapan widhi widana, saha kulawarga sane daha nepak kulkul manut pawos 21 angka da, raris sang istri kaajak budak ring pakubon sang lanang, saha kalanturang antuk pabiakala.
- ra. Ring rahina pawiwahan, seosan ring mapamit kadi ring ajeng, kulawarga lanang istra masadok ring prajuru desa, makadi Kelian Banjar, miwah Kelian Desa Adat pinaka saksi saha malarapan widhi widana cihna puput tumus sekala niskala, pejati lan jauman saking kulawarga lanang katur ring kulawarga istri, maka cihna sang daha sampun puput pangaskaran pawiwahan kalih sampun matilar saking paumahannya sekala lawan niskala.

2. Prade ngarorod/ngrangkat, pengambilane, sang istri keengkebang, reramannya kamalingin. Sang istri kagenahang ring pakubon krama tios utawi ring

seos desa, raris kaetutan kadi pamargi ring sor:

- ha. lumaku sakirang kirang ipun arahina, kulawarga sang lanang ngerauhin purin sang istri, gumanti lumaku, ngangkenin ngambil sang istri. sang manampi rarangkaian pramangkin masadok ring para jufunya.
- na. Babaktan sang lumaku patut macihna antuk suar, lan ilikita nyantenang sang maka kalih pada tresna.
- ca. Makruna, ngaluku, dinanc kapastiang olih sang nruwenang sang istri.
- ra. Sang nruwenang sang istri yan tan cumpu wenang kawentenang panureksa nunas uwak-uwakan mangda katuntun tur kasaksinin olih ipara juru Desa Adat wiadin Dinas.
- ka. Yan macihna pangambilane papaksan, tan gumanti saking pada arsa wenang kapalasang.
- da. Ring rahina pawiwahan pamargine pateh kadi ring ajeng, (1, ra).
- ta. Prade babaosan indik pakidih sampun kaigumang, kulawarga sang istri mangda nepak kulkul manut pawos 21 aksara da, masengker tigang rahina.

3. Nyeburin, pamargine kadi ring sor,;

- ha. Rikalaning makruna, ngaluku babaosane adung saking kulawarga sang istri kalih kulawarga sang lanang.
- na. Ring pangambilane mangda nepak kulkul manut pawos 21 aksara da.
- ca. Pamuput pawiwahan ring pakubon sang istri tur kasaksinin olih para juru desa pamargi pateh kadi ring ajeng (wilangan kaping 1 aksara ra) saha sang nyeburin (lanang) kamanggehang sentana nyeburin.

4. Sajeroning ngilikitayang indik parabian patut kajangkepang antuk akta perkawinan dumogi prasida jangkep saha paripurna upasaksi sekala niskala.

Palet 2

Indik Nyapian

Pawos 58.

1. Pawiwahan prasida kawusang majalaran palas.
2. Wusan mapakurenan riantukan silih tunggil lampus, kabaoc balu, makadi balu lanang utawi istri.
3. Palas marabian sangkaning sami lila, utawi mawiwit wicara kabaos nyapihan.
4. Sang jagi palas marabian patut atur supekta pailikitan ring sang rumaos Pangadilan Negeri, wastu tinas apadang pamutuse kabaos nyapian, wawu ipara juru nyiarang kawentenannya ring Desa.

Pawos 59

Tata caraning palas marabian.

1. Sulus palas marabian prade silih tunggil anasar laku, wirosaning laku, matilar tan pasadok jantos langkungin ring awarsa, wak purusa, tan prasida adung malih.
2. Yaning wicarane katumusang olih lanange, patut sang wadon macihna :
 - ha. Paradara utawi anasar laku.
 - na. Amandal sanggama, maambul-ambulan jantos langkungan ring awasra.
3. Yaning wicarane katumusang olih wadone, patut sang lanang macihna :
 - ha. Drati krama.
 - na. Wangdu.
 - ca. Tan nyanggamin saha tan ngawehin pangupa jiwa ring sang wadon suwennya

jantos langkungan ring awarsa.

4. Prade wicarane macihna kadi ring ajeng wenten saksi, bukti, ilikita parabianne kengin kapalasang.

5. Tata cara palas marabian :

ha. Panguna kaya patut pah pada.

na. Pabekel tatadan kakuasan niri-niri, warisan kekuasaan purusa.

ca. Nawur prabiye pasaksi sinalih tunggil sami matenga.

ra. Nawur pamidanda ngawaliang suaran kulkul manut pararem.

ka. Sang purusa ngawehin pianaknya pangupa jiwa rauhing saprabya manut swadarmaning guru rupaka.

6. Prade riwekas sang palas adung malih, patut :

ha. Yan wenten palas makurenan, yadiastun pada lila, macihna adung malih, patut kakawitin malih ngalaksanayang widhi widana pawiwahan.

na. Yan wenten kadi ring ajeng, keni jadmata ika kadanda panumbas suaran kulkul, nikel, agung alit manut pararem.

Pawos 60

Swadarmaning Balu

1. Sang balu manut pawongan ipun kabinayang dados :

ha. Balu luh wit sentana rajeg, miwah balu luh boya sentana rajeg.

na. Balu muani kapurusan wit sentana, miwah balu muani nyeburin, boya kapurusan.

2. Swadarmaning balu boya sentana rajeg patut :

ha. Ngamanggehang pati-brata tan kengin paradara utawi drati krama.

na. Nguwasayang waris panguna kaya, tan kengin ngadol, ngadeang,

makidihang, sajawaning polih kabebasan saking okane utawi kulawarga
purusa pinih tampek prade okane kantun alit-alit.

ca. Kengin ngangkat sentana prade sampun wenten hidabdab sadurung sinalih
tunggil lampus, saha kabebasan olih kulawarga sinanggeh kapurusan.

ra. Kawenangan mawiwaha malih, prade sampun polih kabebasan saking pianak
daha teruna utawi keluarga purusa.

3. Balu boya sentana rajeg utawi kapurusan kabaos tan pageh lwire :

ha. Sangkaning malaksana diati krama utawi paradara.

na. matilar saking paumahan tan pasadok jantos awarsa.

ca. Ngadol, ngadeang, makidihang druwe warisan tan polih kabebasan saking
waris pinih nampek.

ra. Yan macihna kadi ring ajeng manut ilikita kengin balu inucap:

(1). Katundung antuk pianak utawi kulawarga purusa.

(2). Tan polih pahan waris.

.Palet 3

Pawos 61

Indik Sentana

1. Mungguhing sentana wenten kaucap sentana rajeg utawi pratisentana miwah

sentana paperasan,

2. Pretisentana inggih punika sentana sane metu saking pawiwahan kapatut utawi sah.

3. Prade prabiyane tan ngewetuang sentana kengin ngidih sentana antuk upasaksi

sekala niskala sane kawastanin sentana paperasan.

4. Prade pawiwahan tan kapatut ngawetuang sentana, mangda tan kantun kawastanin babinjat utawi astra patut kamanggala antuk panyangskara.
5. Sentana rajeg inggih punika pratisentana wadon (pradana) sane kamanggehang lanang (purusa) tur risampun ngalaksanayang pawiwahan, nyeburin.
6. Sang sane kaarsayang sentana rajeg inucap wiwit (5), inggih punika :
 - ha. Pretisentana wadon tunggal utawi silih sinunggil pretisentana wadon yanging maka sami pretisentana wadon.
 - na. Sampun kamanggehang dados pretisentana (purusa).
 - ca. Kapawiwahan kacceburin, kausahayang antuk jadma sane maagama Hindu utawi jadma sane maagama siosan sane sampun ngelaksanayang pamarisuda raga utawi sudi Wedani.
 - ra. Sane kamanggehang sentana rajeg patut mapasadok ring iprajuru desa/banjar tur iklian desa/banjar patut nyiarang ring krama desa/banjar.

Pawos 62

Ngangkat Sentana

1. Ngangkat sentana manut dudonan patut macihna arta brana pamerasan antuk widhi widana miwah saksi (sekala-niskala). Pinaka saksi para juru desa lan kulawarga.
2. Sane mapakayun ngidih sentana patut masadok sakirang-kirang ipun tigang sasih sadurung rahina pamerasan ring prajuru desa.
3. I prajuru desa patut nyiarang ring sawidangan desa, sang sapisira ugi rumasa tan lila mangda masengker asasih sadurung pamerasan masadok ring Klian Desa, numusang ring sang yogya makadi Prebekel/ Lurah.
4. Prade sulur pamerasan tan manut kecaping ajeng prajuru desa wenang ngandeg sang pacang makarya, saha ngiccnin pamutus mangda kapuputang riin babaosan

sulur utawi wicarannya.

Pawos 63

Paperasan Sinanggeh Sah.

1. Paperasan sinanggeh sah risampune macilma kadi ring sor :

ha. Nenten wenten nyakutin.

na. Widi widana, upakara pamerasan.

ca. Kasaksianin olih sameton pinih nampek saking sang kaperas lawan sang mameras kalih para juru desa sane ngilikitayang saha kasiarang ring wawidangan utawi paruman desa.

2. Sane patut kaperas anggen sentana lwire :

ha. Jadma maagama Hindu.

na. Kulawarga saking purusa. Yan tan wenten, kengin saking wadon yan taler tan wenten, kengin sakita arep (saking kayun).

ca. Kautamayang saking waris pancer kapurusang.

ra. Sinalih tunggil mawiwit saking kulawarga tunggal sanggah utawi marajan, paibon lan dadia, utawi siosan.

3. Kengin ngangkat sentana langkungan ring adiri lanang wiadin wadon.

Palet 4

Indik Warisan.

Pawos 64

1. Sane kabaos warisan, tetamian sane marupa arta brana lan ayah-ayahan muah

tategenan ngupadi sukerta sekala niskala saking kaluhuran

nya arep sane katiba ring turunannya.

2. Sane kabaos warisan tatamian sane marupa :

ha. Duwe tengah makadi karang paumahan manut pawos 5 wilangan kaping 1 lan tegal miwah carik, ayahan desa pasuka duka, siwakarana, lan sane siosan.

na. Artha brana.

ca. Pamarajan, dadya miwah kahyangan desa lan sapanunggil ipun.

ra. Panguna kayan, tatadan, jiwadana, utang-piutang, lan sapanunggil ipun.

3. Wawu kengin kabaos warisan prade wenten :

ha. Sang mapiturun (pawaris).

na, Katurunan (ahli waris).

ca. Arta brana tategenan (ayah-ayahan) maka cihna warisan.

Pawos 65

1. Sang sane kabaos ahli waris lwire ;

ha. Preti sentana saking purusa.

na. preti sentana (sentana rajeg).

ca. Sentana paperasan (lanang/wadon).

2. Prade tan wenten kadi ring ajeng, kasinanggeh ahli waris :

ha. Turunan purusa pernah ngunggahang makadi rerama lanang, pekak, rerama misan mindon.

na. Turunan purusa pernah kasamping, makadi kaponakan, misan mindon.

3. Darmaning ahli waris patut :

ha. Nerima saha ngutsahayang tetamian pahan kaluhurannya, makadi

ngerempon sanggah/marajan, kahyangan desa, saha pangupakarannya, miwah
ayah-ayahan pawais.

na. Ngabenang ngalantur ngatma wedana/nyekah sang pawaris.

ca. Naur, nampi utang-piutang pawaris lan sapanunggil ipun.

Pawos 66

Mungwing waris kawaris ring Desa Adat Batulantang :

1. Risampun kalaksanayang pitra yadnya lan utang-utang pawaris buntas katawur,
wawu warisan dados kepah.
2. Para ahli waris sami polih pahan sangkaning pangupakaya, sajeroning karang/tegal
ayahan Desa kaamong antuk ahli waris kang sinangeh krama ngarep utawi krama
paron.
3. Siosan ring karang/tegal ayahan desa, warisan sane tan dadod kaepah wiadin
kaadol : merajan/sanggah lan linggih Widhi siosan pusaka makadi karis, lontar,
cakepan lan sapanunggil ipun, patut karaksa olih ahli waris.
4. Sinalih tunggil ahli waris kengin tan polih pahan prade ;
ha. Nilar kawitan lan sajeroning agama (matilar saking Agama Hindu).
na. Alpaka guru rupaka.
ca. Sentana rajeg kesan mawiwaha utawi pretisentana nyeburin soang-soang
kabaos ninggal kadaton.
5. Boya ahli waris kengin muponin hasil manut dudonan lwire :
ha. Sentana luh, selami durung kesah mawiwaha.
na. Balu luh wiadin maani nyeburin (soang-soang boya sentana).

Pawos 67

1. Prade sajeroning pakulawargan wenten ahli waris langkungan ring adiri patut :
 - ha. Kawentenang paigum indik pidum waris inucap.
 - na. Yan tan prasida katunasang tatimbang ring prajuru desa.
 - ca. Prade taler tan wenten cumpu ring panepas prajuru desa patut kadauhang ring Kerta Desa prade tler tan kacumponin, kengin katunasang ring sang rumaos (Pangadilan Negeri).
2. Prade karang inucap kaputungan, patut prajuru desa nibakang ring :
 - ha. Sang sinanggeh ahli waris manut pawos 65 wilangan kaping (1) miwah (2).
 - na. Sang kengin anggen sentana manut pawos 61 wilangan kaping (2) miwah (3).
 - ca. Prade taler tan wenten cumpu ring panepas Kertha Desa, kengin kautsahayang ring sang rumaos (Pangadilan Negeri).
3. Prade jantos karang desa kapah utawi kasapih, patut soang-soang nedunin makrama desa ngarep utawi makrama desa paron.

SARGA 6

SUKERTA TATA PALEMAHAN

Palet 1

Bhaya

Pawos 68

1. Parindik bhaya lwire : jiwa bhaya, artha bhaya, (kapandangan), dura cara ring agama.
2. Sang kahanan jiwa bhaya, patut nepak kulkul bulus mapitulung manut pawos 21 (2)

aksara wa.

3. Prade ring desa kahanan jiwa bhaya, patut desane ngaturang butha yadnya tur sang mawanin katur ring sang ngawiwenang saha keni pamidanda manut pararem.
4. Prade wenten jadma manisuli utawi nguman-uman jadma sios, kakenin pamidanda beya pacamil tebasan prayascita.
5. Prade wenten mamaling (mandung) artha brana, prade kacunduk keni kadanda manut pararem.

Pawos 69.

1. Sang manggihin kahanan artha baya (kamalingan), patut ngulkul mapitulung manut ring pawos 21 (2) aksara wa, utawi sang kamalingan atur guru supeksa ring prajuru desa sane pacang nandanin saha mawuwuh panyangaskara prade wenten jadma mamaling barang sinanggeh suci.
2. Pratingkah mapailon ring dusta kabaos saruron, utawi prade wenten jadma manggihin maling tan nyadokang ring prajuru jantos jadma sios nyaduang, patut kadanda kadi dandaning maling, sakieh pangargan wit manut cakcakan, tur prade jantos ping tiga malaksana asapunika wenang kasukserah ring sang ngawiwenang.
3. Prade wenten jadma ngarereh reramon, minakadi daun kalapa, ron, tan pasadok ring sang nruwenang, prade kacunduk (katara) patut kadanda kadi dandaning maling agung alit manut pararem.
4. Yaning wenten jadma ngranjingin pakubon wiadin pakarangan rikala suwung, mawastu sang madruwe karang kaicalan, wenang jadma inucap katuwekang antukl madewa saksi ring Pura Bale Agung utawi katur ring sang ngawuwenang.
5. Mangda tan katuwekang manut ring ajeng, asing-asing ngranjingin kubon jadma

sios patut :

ha. Matengeran suara (makaukan).

na. Nyantos sang nruwenang karang rawuh utawi masadok ring pangapit pinih tampek, maka buatan pangranjinge.

ca. Pamedal krangnya kasawenin, maka cilna pangarah.

6. Pamargi krama ritatkala ngarepin panca bhaya, dusta lan sapanunggalannya madudonan manut pararem.

Palet 2

Karang Lan Tegal/Carik

Pawos 70

1. Krama sane ngamong karang paumahan, utawi karang ayahan desa patut ngawentenang wates marupa tembok wiadin pagehan, pinih utama sane marep kamargine mangda katon asri.
2. Karang patut magaleng keluanan, teges ipun wates sisi kaler miwah kangin kakaryanin antuk sang madruwe karang ayahan inucap.
3. Carik lan tegal patut magaleng kateben, teges ipun sane kapiara watese sisi kelod miwah kauh utawi sane ngardinin wates patut sane madruwe carik ring luanan, sane kangin wiadin kaler.
4. Wates inucap kengin antuk pagehan turus wiadin pal saking agraria.
5. Makarya wates wiadin tembok mangda kajantenin antuk penyandingnya.
6. Yan wenten karang kaputungan wenang ipara juru nibakang karang ika pinih riin ring krama panyade, yan tan polih wenang katiba ring i krama pangele utawi kulawarga sane pinih tampek saking purusa, yan tan wenten saking wadon.

7. Prade wenten karang kasuwungin (karang embang), madrebe waris, karang ika patut katongosin, kaupakara, yan tan cumpu prajuru desa wenang nibakang manut kadi ring ajeng (wilangan kaping 6).
 8. Yan wenten karang kebebeng, patut ipara juru ngutsahayang wenten margi.
 9. Yan wenten jadma padem ring pakarangan anak sios, wenang sang nruwenang sawa ika nyarunin, mrayascita genahe punika agung alit manut dresta pituduh sang wiku.
 10. Yan wenten jadma padem tan wenten ngangkenin sawa ika, wenang ipara juru masadok ring guru wisesa/pamerintah.
 11. Yan wenten jadma makta wangken manusa ring pakarangan, tegal utawi carik anak sios, wenang sang nruwenang sawa ika nyarunin, mrayascita agung alit manut dresta.
- Upakara upacara ika kamargiang ring genahe kahanan wangke pinih riin. Sane kaentasin patut antuk tirta kewanten.

Pawos 71

1. Sinalih tunggil krama desa tan wehang :

- ha. Ngalah-alah karang, tegal, margi, carik miwah genah sane sinanggeh suci. minakadi kahyangan, margi lan sapanunggilan ipun.
- na. Ngembahang toya wit toyan ujan, wawalungan, pawaregan, lan sapanunggilan ipun, kapekarangan anak sios.
- ca. Ngentungan laluhu, wangken wawalungan ring pakarangan panegalan anak sios.
- ra. Ngentungang tulang manusa ring pakarangan, tegal, carik anak sios.
- ka. Nunjel, nanem wangken manusa yadiastun marupa wangken manusa karesian ring Desa pakraman, tegal wiadin carik.
- da. Makta tanah setra kapekarangan, tegal, carik rikalaning ngendag sawa.
- ta. Mamandung druwen utawi krama sios.

sa. Mademang paksi wawalungan, nuba, nyetrum ulam ring telaga, tukad miwah sarwa prani manut piteket sangawarat/Guru wisesa.

2. Yan wenten jadmamamurug kecap ring ajeng, patut jadmamika ngawaliang tanahe sane kaambil, ngebet sane kapendem, nyampetin sane kaembahin, nyingsirang sane marupa lalu, wangken wawalungan, tur patut jadmamika kadanda agung alit manut pararem. yan ngaletihin genah sane sinanggeh suci (wilangan kaping 1,ra, ka, da) sajawaning kadanda kadi ring ajeng patut kawewehin antuk prayascita, caru agung alit manut dresta kalih sastra Agama.

Palet 3

Pawos 72

Papayonan.

1. Nanem tanem tuwuh papayonan patut adepa agung ngajeroang saking wates (kirang langkung 1,50 meter).
2. Yan wenten taru mentik sajeroning wates, patut ika kaebah, kabagi tiga, asiki kaatur ka desa, kakalih ring sang nruwenang wates.
3. Yan wenten entik-entikan taru lan sapanunggal ipun sinanggeh mayanin, prade pungkut utawi empak ngrubuhin wawangunan krama sios, sang nruwenang wit keni kadanda manut pararem.
4. Yan wenten taru ngungkulin utawi sinanggeh mayanin kapisaga patut kawara antuk paigunan ping ajeng prasida sang nruwenang wit ngebah utawi notor, Prade sampun kawara taler tan wenten usaha, sang rumasa katetchan wenang masadok ring prajuru, tur ngamargiang kadi ring sor :
ha. Natasang genah ipun.

- na. Yan sampun wiakti kapakayun, wit daunnya rob, utawi wit ipun banget sendeh, bungkilnya teda tetani, umahin semut lan sapanunggal ipun.
- ca. Ipara juru patut niwakin sang nruwenang taru ika, notor nyepat gantungi utawi ngebah masengker awuku.
- ra. Yan lintang kadi sengker dereng kalaksanayang wenang ipara juru nibakang ring sang kababatan nyapat gantungin utawi notor yan ipun ngungkulin, ngebah yan ipun mayanin.
- ka. Taru ika katiba ring sang notor/ngebah.
- da. Yan prade sadurung sengker metu mayanin, sang nruwenang taru luput ring kaiwangan.
5. Yan wenten jadma notor, monggol utawi ngebah taru, mawetu mayanin kapisaga keni jadma ika kadanda manut pararem.
6. Krama Desa patut ngamanggehang kawerdian tanem tuwuh sane ngawinang desane asri tur lestari.

Palet 4

Wawangunan

Pawos 73

1. Saluwiring wawangunan mangda kautsahang nganutin kecap kosala kosali miwah asta bumi, sanistane patitis niskala.
2. Yan wenten ngawitin ngawangun raris ngalintangin wiadin ngungkulin kapisaga, makadi capcapan lan sapanunggal ipun, bilih-bilih temboke ring telengin wates metu pisagane kababatan risampun kawara tur kasadokang ring prajuru kengin

ipara juru nyepat gantungin mangda sang madruwe wawangunan ika kagubar, utawi sanistane mangda kakaryanin abangan tan polih prabiya, utawi kapocolan.

Palet 5

Wewalungan

Pawos 74

1. Sahananing warga desane sane mumiara wewalungan, patut sayaga nitenin, negul wiadin ngandangin mangda tan ngarusak kapisaga bilih-bilih ngranjing ka pura wiadin ka pamrajan.
2. Yan wenten wawalungan ngranjing ka genah suci, mekadi marajan, pura lan sapanunggal ipun yadiastun katut uri, sang sane nruwenang wawalungan ika patut kadanda mrayascita nyarunin agung alit manut pararem kalih sastra Agama.
3. Prade wenten wawalungan ngeleb tur ngarusak, neda tatanduran kapisaga, risampun kawara kengin kataban wenang sang nruwenang wawalungan ika kadanda agung alit manut pararem. Sajawaning kadanda taler kasisipang nawur sapangargan abian sane kateda/karusak saha nawur panebas papiaran tetabanan agung alit kaetang nganut pangalokika para juru desa lan pararem.
4. Krama desa patut nyerayanin wawalungan niwah sarwa prani, tan kapatutang maboros paksi, nuba ulam lan siosan punika.

Pawos 75

Tata Cara Naban

1. Sajeroning arahina sang polih naban wawalungan patut masadok ring para juru desa.

2. Sang sane naban patut ngusahayang mangda wawalungan inucap polih tatedan.
3. Prade wawalungan sane katuban padem sangkaning tan gumanti, wenten saksi, sang naban luput ring kaiwangan. Prade padem sangkaning tan polih neda, sang naban patut nawur pangargan wawalungan punika manut pangargan hidup tur kadanda manut pararem.
4. Sasampune limang rahina pasadoke ring para juru tan wenten mariangkenin, wawalungan ika patut katur ring pamerintah.
5. Prade sadereng sengker, wenten jadma ngangkenin wawalungan, risampun katetes olih prajuru majanten jadma ika sane nruwenang, jadma ika keni kadanda lan panumbas tataban (tetedan) agung alit manut pawos 74 wilangan kaping 3.

SARGA 7

WICARA LAN PAMIDANDA

Palet 1

Indik Wicara

Pawos 76

1. Sane wenang maosin makadi mutusang wicara ring Desa inggih punika prajuru Desa sinanggeh Kertha Desa:
ha. Iklian banjar, pradene sung mawicara sane patunggilan banjar.

na. Bendesa Adat/Pakraman prade sang mawicara sami-sami ring patunggalan
Desa, Desa Adat/Pakraman.

2. Dudonan maosin saha muputang wicara warga desa kadi ring sor :
ha. Kaping ajeng kabaosin antuk klian banjar kasarengin Klian Desa.

na. Tan cumpu ring panepas klian banjar/klian desa katunasang ring
panglingsir banjar/Desa sinanggeh Kertha desa.

ca. Prade taler pamatut panglingsir desa tan kacumponin, katunasang ring
paruman desa/banjar sinanggeh wasananing pamutus.

Pawos 77

1. Sahanan wicara mawiwit kacorahan sakaluiring sinanggeh nungkasin daging
awig-awig, pasuaran miwah pararem desa/banjar, prajuru/dulu patut digelis
kabaosin tan nyantos pasadok.
2. Sajaba wicara kadi ring ajeng patut nyantosang pasadok sang nunas baos.
3. Panepase patut pastika nyantenang iwang patut malarapan Tri Pramana
(saksi, ilikita, bukti) miwah tan maren nepek ring Catur Drestha.

Palet 2

Indik Pamidanda

Pawos 78

1. Desa/Banjar wenang niwakang pamidanda ring warga desa sane sisip.
2. Paniwak inucap kamargiang olih Kelian Desa/Kelian Banjar.
3. Bacakan pamidanda lwire :
ha. Ayahan punukun kasisipan.
na. Danda arta (dadosan, danda saha panikel paturunan).

- ca. Rerampangan.
 - ra. Kadaut karang ayahannya, utawi kasepekan.
 - ka. Panyanggaskara.
 - da. Kawaliang pipil nyane (kawusang makrama).
4. Pamidanda sane katiwakang patut masor singgih manut ring kasisipane agung alit manut pararem.
 5. Jinah utawi raja brana pamidanda ngranjing dados druwe Desa/Banjar.

Pawos 79

1. Krama sane langkung ring tigang paruman (tigang sasih) nglantur tan nawur urunan, dadosan, panikel miwah dadenda wenang karampag.
2. Rerampagan ngangge tata cara kadi ring sor :
 - ha. Kalaksanayang antuk prajuru kasarengin antuk pacalang lan krama desane tigang diri maka saksi.
 - na. Sang ngrampag saking darsana ngambil barang utawi nyawenin tanem tuwuh, akehnya manut ring utang sang karampag.
 - ca. Prajuru miteketang mangda barang-barang sane karampag digelis katebus, masengker awuku ring arahina pacang kadol.
 - ra. Tan nganinin saluwir barang sane patut inggilang manut Agama rniwah mademang pangupa jiwa sang karampag.

Pawos 80

1. Prade sang pacang karampag ngwara (ngalangin) pamargi inucap mawastu sampun tan nganutin awig-awig wenang karang desa sane kagenahin kadaut antuk desane utawi kasepekan.
2. Samalih yan purun taler ngalangin pamargi kadi ring ajeng tan wenten pamargi sajawaning kawaliang pilil nyane (kawusang makrama).

3. Pamidanda inucap ring ajeng keni buntas risampun sang kakeninin :
ha. nunas geng pangampura ring krama desa riantukan nguak pasubaya
(pararem) pecak.
na. Nawur pangargan panguak pasubaya duk pacang karampag kadulurin
prayascita.

SARGA 8

NGUWAH NGUWUHIN AWIG-AWIG

Pawos 81

1. Nguwah nguwhin awig-awig desa punika kamargiang olih paruman desa.
2. Pamutus babaosane mangda kautsahayang wetu saking pakayun gilik saguluk.
3. Awig-awig puniki kamargiang ngawit kaingkupin (kararemin).

SARGA 9

PAMUPUT

Pawos 82

1. Awig-awig puniki kawastarin awig-awig Desa Adat Batulantang.
2. Awig-awig puniki kamargiang, kasungkemin ring paruman.

Pawos 83

1. Awig-awig puniki kamanggehang sajeroning Desa Adat Batulantang.
2. Sakaluring sane wenten saderengnya patut kaanutang ring sadaging awig-awig puniki.

Pawos 84

1. Awig-awig puniki kasungkemin ring paruman duk rahina : anggara kliwon wuku Tambir, pangelong ping dasa sasih kasa, icaka 1932, tanggal 6 juli 2010, ring Bale Desa Adat Batulantang.
2. Awig-awig puniki kalingga tanganin olih Kelian Banjar Adat kasarengin Kelian Desa Adat, saha kasaksinin olih Kelian/Kepala Dusun miwah Perbekel Desa sawidangan Desa Adat Batulantang saha kapikukuh antuk Camat lan Bupati.

3. **လွဝီ သံ ဟင်္ဂါဗူဇာတါး**
LuwirSang Ngalingga tangan.

၁။ ကရိယာဇာတိသမာဗဟူဗူဇာတါး
Kelian Beshadat Batulantang
၁။ ဟင်္ဂါဗူဇာတါး
I Made Sarpa

၂။ ကရိယာဇာတိသမာဗဟူဗူဇာတါး
2. Kelian Banjar Adat batulantang

၁။ ဟင်္ဂါဗူဇာတါး သံဗဟူဇာတါး
I Gusti Nyoman Artawan

ဗဟူ သမာဗဟူဇာတါး

Maka saksi-saksi

၁။ ကရိယာဇာတိသမာဗဟူဗူဇာတါး
1. Kelian Banjar Dikas Batulantang
၁။ ဟင်္ဂါဗူဇာတါး
I Putu Japa

၂။ ကရိယာဇာတိသမာဗဟူဗူဇာတါး
2. Perbekel Desa Sulangai
၁။ ဟင်္ဂါဗူဇာတါး သံဗဟူဇာတါး
Putu Gede Darmawan, S.H.

ပမိကူဇာတါး

Pamikukuh

၁။ ဟင်္ဂါဗူဇာတါး
Desa Petang
၁။ ဟင်္ဂါဗူဇာတါး

၁။ ဟင်္ဂါဗူဇာတါး သံဗဟူဇာတါး
I NYOMAN SUARDANA, S.Sos, M.M.

၁။ ဟင်္ဂါဗူဇာတါး
NIP.010244212

၁။ ဟင်္ဂါဗူဇာတါး

၁။ ဟင်္ဂါဗူဇာတါး
BUPATI BADUNG
၁။ ဟင်္ဂါဗူဇာတါး သံဗဟူဇာတါး
A.A. GDE AGUNG, S.H.